

Sosialisme en kommunisme

Verbeel jou daar is 'n land waar niemand ryk of [arm](#) is nie. Niemand besit 'n eie onderneming nie, want die fabriek behoort aan almal. Daar is dus nie ryk eienaars nie, maar ook nie arm werkers nie. Dit klink vreemd, nè? Dit is egter die basiese idee van sosialisme, maar in die praktyk werk dit nie altyd volgens die sosialiste se ideaal nie.



Wat is *sosialisme* dus? Dit is 'n ekonomiese en politieke stelsel wat gegrond is op die kollektiewe, gemeenskaplike of openbare eienaarskap van alle produksiemiddele. Dit sluit masjinerie en fabriek in wat gebruik word om goedere te **vervaardig** om aan mense se [behoefte](#)s te voldoen. ¹ Sosialisme het dus meer met die [ekonomie](#) te doen en die doel is dat **welvaart** gelyk verdeel moet word.

Die ontstaan van sosialisme

Sosialisme het ontstaan as 'n reaksie op [kapitalisme](#). In 'n kapitalistiese bestel mag mense eiendom besit en mense en maatskappye ding met mekaar mee vir welvaart. Daar is dus sterk **mededinging** tussen maatskappye vir **verbruikers** se geld.

Tydens die 1700's en 1800's is masjinerie uitgevind en baie van die take wat mense eers verrig het, is toe deur masjinerie oorgeneem. Dit het daartoe gelei dat **produksie** in fabriek verhoog kon word en hierdie tyd staan as die Industriële Revolusie bekend. Kapitalisme het flink in hierdie tydperk gegroei en sekere mense, soos fabriek-eienaars, het vinnig ryk geword terwyl ander, soos die fabriekwerkers, steeds swaargekry het. Hulle het min geld gekry en hul werksomstandighede was dikwels **haglik**. Soos 'n mens kan dink, het dit baie werkers kwaad gemaak.



Mense het toe begin speel met idees hoe om die probleem op te los. Een idee was dat **regerings** moes ingryp, nywerhede beheer en só 'n gemakliker en beter lewe

vir al die **burgers** kon skep. Dié stelsel wat hulle voorgestel het, was sosialisme. ²

Die wortels van sosialisme

Hoewel daar ooreenstemming is dat sosialisme tydens die [Industriële Revolusie](#) ontstaan het, het die eintlike idee daarvan lank voor daardie tyd ontstaan. Dit was die Antieke Grieke wat met hul idees ver voor hul tyd was. Só het die **filosoof** [Plato](#) in sy dialoog *Republic* 'n kollektiewe **samelewing** voorgestel met wortels van sosialisme. **Kollektief** beteken dat die mense saamwerk en saam besluite neem en optree. Dit was reeds in 360 v.C.

Sir Thomas More het in die 16de eeu in sy werk *Utopia* geskryf oor 'n plek waar geld afgeskaf word en mense op dieselfde vlak werk en leef. ³

Die ontwikkeling van sosialisme

Vroeë sosialiste soos Henri de Saint-Simon, Robert Owen en Charles Fourier het modelle vir sosialistiese gemeenskappe opgestel. Hulle wou hê dat mense eerder saam met mekaar moes werk, pleks daarvan om met mekaar mee te ding. Saint-Simon se voorstel was dat die regerings van lande die **produksie** moes beheer en dat die goedere tot almal se voordeel verdeel moes word. Fourier en Owen het bietjie anders gedink en hul voorstel was dat daar net klein kollektiewe gemeenskappe moes wees, pleks van een sentrale staat. ³



Robert Owen



Henri de Saint-Simon



Charles Fourier

Van sosialisme na kommunisme

Die sosialiste se idee was dat die eienaarskap van fabriek en eiendom mettertyd vanaf die ryk mense na die werkers oorgedra moes word, maar nie almal het gedink dat dit **realisties** is nie. Hulle wou beslis nie wag vir 'n verandering wat baie jare kon vat nie.

Hul plan was dat die kapitalistiese stelsels omvergewerp moes word en deur 'n nuwe klas vervang moes word. Waar kom dié idee vandaan? Van die Duitse akademikus [Karl Marx](#) (1818-1883). Hy het geglo dat die sosialiste se drome onrealisties was en dat daar slegs verandering deur aksie kon kom.



Karl Marx

Hy het gesê dat die samelewing uit klasse bestaan en as sekere klasse produksie beheer, sal hulle die mag gebruik om die arbeidsmag (of werkers) uit te buit.

Hy en Friedrich Engels se bekende manifeste het die grondslag van kommunisme geword. Hulle het geargumenteer dat ware wetenskaplike sosialisme net bereik kan word as werkers vir hulself opstaan, 'n **revolusie** lei en die kapitaliste **omverwerp**. As die werkers (of soos hy hulle genoem het, die proletariaat) as oorwinnaars uit die stryd tree, sal hulle die nuwe regerende klas word.

Hy het geglo dat daar dan 'n ware kommunistiese samelewing kan ontwikkel. Maar wat behels so 'n samelewing? Niemand mag privaat eiendom besit nie, daar moenie 'n regering wees nie en mense vervaardig goedere op grond van hul vermoëns. ⁴

Kommunisme is dus 'n ekonomiese of politieke stelsel waarmee die staat alle eiendom, industrie en ekonomiese instellings besit en beheer, en alle mense gelyk behandel - of ten minste probeer om dit te doen. ¹

As jy in 'n kommunistiese land bly, kan jy byvoorbeeld nie jou eie onderneming besit of jou oupa sy eie plaas besit nie. Dit vat dus die idees van sosialisme verder.

Selfs nadat Marx dood is, het sy idees versprei en gegroei en dit is mettertyd deur verskeie politieke partye opgeneem en daarop uitgebrei. ³



Die eerste kommunistiese regering is deur die Russe geskep. Dit het ná 'n revolusie in 1917 gebeur.

Die nuwe leier, Vladimir Lenin, se politieke party het Marx se idees **geïmplementeer**. Hy het sy party die Kommunistiese Party genoem en hulle het ook in 1922 die Sowjetunie (vandag is dit Rusland) tot stand gebring. Die slagspreuk was “Die groot sprong vorentoe”.

Dit was katastrofies vir die bevolking. Tydens die regerings van Lenin en Joseph Stalin het tussen 60 en 100 miljoen mense gesterf. Groot skaalse hongersnood het die Sowjetunie getref toe baie suksesvolle kleinboere van hul grond verwyder is. Miljoene mense is vanaf die jare twintig tot die jare vyftig in strafkampe geplaas en dikwels ook tereggestel. Dit was mense wat as “gevaarlik” vir die staat gesien is. Dit het beteken dat selfs skrywers wat krities was teen die staat, asook ryk plaaseienaars, toegesluit is.

Hierdie strafkampe is Gulag genoem. Dis 'n **akroniem** wat basies die administrasie van korrektiewe arbeidskampe beteken.

Baie lande in Oos-Europa het by die Sowjetunie aangesluit en ook kommunisties geword. ⁵

Ná die [Tweede Wêreldoorlog](#) het kommuniste beheer oor China, Noord-Korea, Viëtnam en Kuba geneem en baie Afrikalande het ook kommunisties geword.

Die Verenigde State van Amerika en sy bondgenote was gekant teen die verspreiding van kommunisme en dit het tot die sogenaamde [Koue Oorlog](#) tussen die Sowjetunie en die VSA gelei. ⁵



In die jare negentig het die Sowjetunie tot 'n val gekom en al sy lidlande het onafhanklik geword en meer [demokratiese](#) regeringsvorms aangeneem.

Kommunisme het dus daar tot 'n val gekom en lande het meer kapitalisties geword. ⁵

Die verskille tussen sosialisme en kommunisme

In 'n kommunistiese land word alle ekonomiese hulpbronne deur die staat besit en beheer. Individue mag geen persoonlike eiendom of bates besit nie.	Sosialiste glo individue mag privaat eiendom en bates besit, maar alle nywerhede en fabriekes moet gemeenskaplik besit word en deur 'n demokratiese verkose regering beheer word.
Ingevolge kommunisme moet goedere vervaardig word om in mense se basiese behoeftes te voorsien en dan gratis aan mense versprei word.	Volgens sosialisme word goedere vervaardig om die individu en die samelewing se behoeftes te bevredig en word verdeel volgens die individuele vermoë en bydrae tot die proses.
Daar is geen sosiale klasse in 'n kommunistiese bestel nie en niemand kan meer as ander verdien nie. Al werk jy byvoorbeeld harder as jou buurman, sal julle steeds dieselfde geld verdien.	In 'n sosialistiese bestel, bestaan sosiale klasse en dis moontlik vir mense om meer as ander te verdien.
Kommunisme laat geen beoefening van godsdiens toe nie.	Sosialisme maak voorsiening vir vryheid van godsdiens. ⁶

Sosiaal-demokrasie

Sosiaal-demokratiese partye het in die 20ste eeu toenemend in baie Europese lande **veld gewen**. Hul idees is basies gegrond op sosiale hervormings soos openbare onderrig en gesondheidsorg deur 'n demokratiese regering met 'n hoofsaaklik kapitalistiese [ekonomie](#).

Dit beteken dat hulle glo dat 'n samelewing en ekonomiese demokraties bestuur moet word en dat daar in die behoeftes van al die burgers voorsien moet word. Hulle voel die regering het 'n verantwoordelikheid om sy burgers met welsynsprogramme te help, terwyl 'n **vryemarkte ekonomie** (waar mense met mekaar mag meeding en ondernemings en eiendom mag besit) aangemoedig word. Hul ekonomieë is dus afhanklik van sterk kapitalisme en kan as 'n

gemengde ekonomie beskryf word.



Het jy geweet?

Daar is 'n verskil tussen sosiaal-demokrasie en demokratiese sosialisme.

Sosiaal-demokrasie is gegrond op 'n kapitalistiese ekonomiese stelsel en het regeringsinstellings wat deur maatskaplike programme in burgers se behoeftes voorsien.

Demokratiese sosialisme het 'n visie van 'n samelewing en ekonomie wat demokraties is en waar individue meer sê as groot maatskappye het. Hierdie stelsel wil die ekonomie sosialisties eerder as kapitalisties hê. ⁶

Woordbank

akroniem	'n Enkele woord saamgestel uit die eerste letter(s) van die komponente van 'n begrip, omskryf deur verskeie woorde, bv. Soweto is die akroniem vir "South Western Townships".
bates	Besitting wat iemand of 'n maatskappy voordelig kan aanwend.
bestel	In hierdie geval beteken dit "bewind" of "regime".
burgers	Mense wat lede van 'n stad of staat is.
demokraties	'n Regeringsvorm deur verteenwoordigers wat deur die hele bevolking gekies is, en gekenmerk word deur vryheid van spraak, van die individu, van die reg, en van die media.
ekonoom	Sakekenner; beoefenaar van die ekonomiese wetenskap.
filosoof	'n Denker, geestelike, (hoog)geleerde, intellektualis, soos Plato.
haglik	In 'n baie slegte toestand, bedenklik; rampsalig.
geïmplementeer	Ten uitvoer bring, toepas, bewerkstellig.
kollektief	Gesamentlik, gemeenskaplik
mededinging	Wanneer mense of ondernemings beter as hul teenstander(s) wil doen/presteer.

omverwerp	Om iets te laat misluk.
produksie	Die lewering of vervaardiging van 'n produk.
produktiwiteit	Die aantal produkte wat in 'n sekere tyd vervaardig word.
realisties	Wat die werklikheid weergee.
regerings	Die bestuur van 'n land.
revolusie	Dis 'n situasie waarin mense van 'n land baklei om die bestaande regering met 'n regering van hul keuse te vervang.
samelewing	Mense in die algemeen, soos hulle in gemeenskappe saamleef, veral in gemeenskappe waarin hulle dieselfde gewoontes, wette, ensovoorts het.
veld gewen	Vooruitgang maak.
verbruikers	Iemand wat goedere of dienste vir persoonlike gebruik koop.
vervaardig	Maak, fabriseer, voortbring.
vryemarkeconomie	Waar mense met mekaar mag meeding en ondernemings en eiendom mag besit.
vryemarkstelsel	Dis 'n ekonomiese stelsel waar vraag en aanbod die prys van goedere en dienste bepaal.
welvaart	Rykdom.
werkers/werknemers	Iemand wat vir 'n loon of 'n salaris werk.

Lees dié artikels om meer te leer

- [Meer oor kommunisme](#)
- [Vind meer uit oor sosialisme](#)

Kyk dié video om meer te wete te kom

Die verskil tussen kapitalisme, sosialisme en kommunisme